

Na osnovu člana 112. stav 3. Zakona o zdravstvenoj zaštiti ("Službene novine Federacije BiH", broj 29/97), a na prijedlog fakulteta zdravstvenog usmjerenja Federacije Bosne i Hercegovine, federalni ministar zdravstva, donosi

PRAVILNIK

O IZMJENAMA I DOPUNAMA PRAVILNIKA O SPECIJALIZACIJI PORODIČNE MEDICINE

Član 1.

U Pravilniku o specijalizaciji porodične medicine ("Službene novine Federacije BiH", broj 7/99) (u daljem tekstu: Pravilnik), u članu 1. u stavu 1., iza riječi "medicine" dodaju se riječi: "kao i način i uvjeti evaluacije plana i programa specijalizacije porodične medicine, te polaganje specijalističkog ispita."

Član 2.

Iza člana 1. dodaje se novi član 1a. koji glasi:

"Član 1a.

Federalno ministarstvo zdravstva raspisuje konkurs za dodjelu specijalizacija iz oblasti porodične medicine za tekuću akademsku godinu, uz saglasnost katedri porodične medicine, a na osnovu prijedloga planova kantonalnih ministarstava zdravstva za ovu specijalizaciju."

Član 3.

U članu 2. iza tačke 2. dodaje se nova tačka 2a., koja glasi:

"2a. PREKID SPECIJALIZANTSKOG STAŽA

Specijalizantski staž obavlja se, u pravilu bez prekida.

U slučaju spriječenosti za rad u trajanju dužem od mjesec dana i odazivanja na poziv vojnih organa, prekida se specijalizantski staž i produžuje za vrijeme koliko je prekid trajao.

Prekid specijalizantskog staža ne može biti duži u jednokratnom trajanju od 12 mjeseci.

Prekid iz stava 3. ove tačke odobrava rješenjem federalni ministar zdravstva, na zahtjev zdravstvene ustanove za koju specijalizant specijalizira, a uz prethodnu ocjenu Odbora za evaluaciju i certifikaciju specijalizacije porodične medicine.

Uz zahtjev za prekid specijalizantskog staža potrebno je priložiti i dokaze o uzroku prekida specijalizantskog staža (poziv vojnog organa, doznake o bolovanju i sl.).“

Član 4.

Tačka 3. mijenja se i glasi:

“3. EVALUACIJA

Specijalizant će biti evaluiran nakon završetka svakog individualnog predmeta, standardizirano evaluacionom formom koja će testirati znanja, vještine i stavove iz pojedinih oblasti porodične medicine.

Standardizirana evaluaciona forma će zamijeniti postojeći sistem vođenja specijalizantskih knjžica.

Tokom obavljanja specijalizantskog staža, specijalizant je dužan uraditi specijalistički rad koji mora biti odobren od šefa katedre porodične medicine.

Svaki specijalizant ima pravo da bude blagovremeno informiran o minimumu standarda koje treba zadovoljiti prilikom procesa evaluacije, a to su: znanje osnovnih i kliničkih nauka odgovarajućih medicinskih disciplina, odgovarajuće kliničke vještine i znanja usko vezane za specijalizaciju porodične medicine, profesionalan i etički stav prema pacijentima i ostalim zdravstvenim radnicima, te aktivno učestvuje u procesu edukacije.

Za svaku komponentu programa će biti imenovan mentor za taj predmet. Mentora za kliničke predmete imenuje direktor kliničkog centra, odnosno kantonalne bolnice ili doma zdravlja odnosno direktor druge zdravstvene ustanove u kojoj se provodi odgovarajuća komponenta plana i programa specijalizacije porodične medicine. Mentora za porodičnu medicinu imenuje šef katedre porodične medicine. Mentori su zaduženi za pregled svih evaluacija, kao i blagovremeno popunjavanje standardiziranih evaluacionih izvještaja, te pružanje stručne pomoći specijalizantima prilikom izrade specijalističkog rada.

Pregledane evaluacije i sačinjeni evaluacioni izvještaji su sastavni dio dosjea svakog specijalizanta. Vođenje pojedinačnih dosjea o evaluaciji tokom programa specijalizacije je obaveza šefa katedre porodične medicine odnosno lice koje on ovlasti.

Uspješna evaluacija iz svih komponenti programa je preduvjet za izdavanje preporuke za pristupanje polaganju specijalističkog ispita.

3.1. NEGATIVNO OCIJENJENE EVALUACIJE I POSTUPAK PO ŽALBI

Specijalizantu je garantirano pravo žalbe u slučaju negativno ocijenjene evaluacije i s tim u vezi nezadovoljavajućeg evaluacionog izvještaja. Žalba se izjavljuje žefu katedre porodične medicine u roku od osam dana od dana prijema evaluacionog izvještaja. Žef katedre porodične medicine dužan je riješiti žalbu u roku od 30 dana računajući od dana njenog prijema.

Protiv odluke žefa katedre porodične medicine može se izjaviti žalba u drugom stepenu Odboru za evaluaciju i certifikaciju specijalizacije porodične medicine Federalnog ministarstva zdravstva. Odluka Odbora je konačna.

Ukoliko u drugom stepenu, od strane Odbora iz stava 2. ove tačke, bude potvrđena prvostepena odluka o negativno ocijenjenoj evaluaciji, specijalizantu se oduzima pravo na dalje obavljanje specijalizacije porodične medicine. Donošenje rješenja o oduzimanju prava daljeg obavljanja specijalizacije, na osnovu prethodne ocjene Odbora, je u nadležnosti federalnog ministarstva zdravstva.“

Član 5.

Iza tačke 4. dodaje se nova tačka 4a., koja glasi:

“4a. ORGAN ODGOVORAN ZA EVALUACIJU I CERTIFIKACIJU SPECIJALIZACIJE PORODIČNE MEDICINE

Organ odgovoran za evaluaciju i certifikaciju specijalizacije porodične medicine je Odbor za evaluaciju i certifikaciju specijalizacije porodične medicine Federalnog ministarstva zdravstva (u daljem tekstu: Odbor).

Odbor broji šest (6) članova i čine ga predstavnici FMT centara: Tuzla, Sarajevo, Zenica i Mostar, te dva predstavnika Federalnog ministarstva zdravstva. Članove odbora imenuje i razrješava federalni ministar zdravstva na prijedlog žefova katedri porodične medicine. Mandat članova Odbora traje tri godine s mogućnošću reizbora za još jedan mandatni period. Predsjedavajući Odbora bira se iz reda članova Odbora na prvoj konstituirajućoj sjednici. Mandat predsjedavajućeg Odbora traje jednu godinu s mogućnošću reizbora za još jedan mandatni period. Odbor može imati u svom sastavu i počasne članove. To su inostrani eksperti za oblast porodične medicine. Oni mogu učestvovati u radu Odbora, pružati mu stručnu pomoć u formiranju i implementaciji procesa evaluacije i certifikacije, ali bez prava odlučivanja.

Zadaci Odbora su:

daje preporuke i smjernice u vezi politike evaluacije i certifikacije specijalizacije porodične medicine;

cijeni opravdanost prekida specijalizantskog stažaja, te svaki pojedinačni zahtjev zajedno sa svojom ocjenom prosljeđuje federalnom ministru zdravstva u čijoj je nadležnosti donošenje rješenja o odobravanju prekida specijalizantskog stažaja;

na osnovu prijedloga katedri porodične medicine, sačinjava listu kvalificiranih specijalizanata koji su teoretski i praktički osposobljeni za polaganje specijalističkog ispita i dostavlja je federalnom ministru zdravstva u čijoj je nadležnosti izdavanja rješenja o odobrenju polaganja specijalističkog ispita;

rješava u drugom stepenu, po zahtjevima izjavljenih na odluke Odbora katedre porodične medicine o negativno ocijenjenim evaluacijama i nezadovoljavajućim evaluacionim izvještajima;

donosi ocjenu o oduzimanju prava na dalje obavljanje specijalizacije, te istu prosljeđuje federalnom ministru zdravstva u čijoj je nadležnosti donošenje rješenja o oduzimanju prava na dalje obavljanje specijalizacije;

određuje datume održavanja specijalističkog ispita za tekuću akademsku godinu;

daje prijedlog federalnom ministru zdravstva za visinu naknade za specijalistički ispit koja se isključivo koristi za podmirenje organizacijskih troškova i vođenje specijalističkog ispita za jednu akademsku godinu;

daje prijedlog federalnom ministru zdravstva za formiranje ispitnih komisija za jednu akademsku godinu;

obavlja i druge poslove i zadatke koji su od uticaja na evaluaciju i certifikaciju specijalizacije porodične medicine.

Odbor ima pravo na naknadu za svoj rad. Troškove naknade rada Odbora utvrđuje rješenjem federalni ministar zdravstva.“

Dosadašnje tač. 5. i 6. postaju tač. 6. i 7.

Član 6.

Iza tačke 8. dodaje se nova tačka 8a., koja glasi:

“8a. SPECIJALISTIČKI ISPIT

Specijalistički ispit polaže se pred Ispitnom komisijom.

Ispitna komisija donosi poslovnik o svom radu i uređuje način polaganja specijalističkog ispita, te precizira ispitne metode.

Polaganje specijalističkog ispita organizuje se godišnje, u pravilu, tokom prve dvije sedmice u septembru odnosno tokom zadnje dvije sedmice predstojećeg januara.

Troškove polaganja specijalističkog ispita snosi specijalizant ili zdravstvena ustanova za koju specijalizant specijalizira.

Specijalizanti koji ne zadovolje u prvom ispitnom roku imaju pravo da po isteku šest mjeseci, računajući od dana održavanja prvog ispitnog roka, ponovo pristupe polaganju specijalističkog ispita. Ukoliko specijalizant ne zadovolji i u drugom ispitnom roku zadržava pravo ponovnog polaganja specijalističkog ispita nakon isteka roka od šest mjeseci, računajući od dana održavanja drugog ispitnog roka. Ukoliko specijalizant ne zadovolji u trećem ispitnom roku, trajno gubi pravo na polaganje specijalističkog ispita.

Ispitna komisija utvrđuje standarde potrebnih znanja iz oblasti porodične medicine, a koji su opredjeljujući za konačnu odluku: zadovoljio - nije zadovoljio.

Po završetku ispita Odbor će dostaviti federalnom ministru zdravstva listu kandidata koji su uspješno položili specijalistički ispit.

Federalni ministar zdravstva je ovlašten za izdavanje i potpisivanje certifikata o uspješno položenom specijalističkom ispitu u skladu sa propisima o specijalizaciji zdravstvenih radnika koji se primjenjuju na području Federacije Bosne i Hercegovine.“

Član 7.

Iza člana 2. dodaje se novi član 2a., koji glasi:

“Član 2a.

Na pitanja, koja nisu regulirana ovim pravilnikom, primjenjivat će se odredbe propisa o specijalizaciji zdravstvenih radnika koji se primjenjuju na području Federacije Bosne i Hercegovine.“

Član 8.

Ovaj pravilnik stupa na snagu osmog dana od dana objavljivanja u “Službenim novinama Federacije BiH“.

Broj 01-37-6664/00 13. novembra 2000. godine Sarajevo

Ministar prof. dr.Božo Ljubić, s.r.